

JESTONI VORTEX SUTRA

ANDRIAN LEGASPI

Nag-antanda ang katabi kong semi-jejemon
nang mapadaan ang bus sa harap ng Shoemart,
Si Henry Sy ang kanyang panginoon.
HnD qHow xiA mhAcCc.

Nakasakay ako sa pampasaherong bus,
walang air-con, kinse pesos kada tao.
"Ibabayad nyo rin ba ang inyong kaluluwa?"
tanong ng konduktor sa akin.
"Hindi po, kakandungin ko na lang,"
sagot ko.

Trapik na naman.
Naghuhukay ng ginto ang Maynilad.
Pero presko pa rin sa loob ng bus.
Mahangin.
Nagmumula ang hangin sa rumaragasang
papasalubong na mga sasakyan sa
kabilang linya ng kalsada.
Pagod na pagod na kasi akong punasan
ang lumuluha kong noo gamit ang aking
off-white na Good Morning Towel na
mas matanda pa sa akin.

May maliit na TV sa bus mula Japan Surplus,
May DVD din, Lexing ang tatak gawa sa Tsina.
Aksyon ang palabas na pelikula,
Si Jestoni Alarcon ang bida,
Si Rita Avila ang kanyang kapareha.
Mahilig sa pansit si Rita,
Inuuwian sya ni Jestoni nito gabi-gabi.
Mahirap lamang sila pero primera-klase
ang leather jacket ni Jestoni.

Ang dami nang nangyari sa pelikula
pero kami hindi pa rin umuusad ang bus.
Ginahasa ni Bomber Moran si Rita,
Sumigaw nang nakaluhod si Jestoni habang naulan,
Naghiganti si Jestoni,
Niratrat niya si Bomber,
Nag-outing sila sa beach,
Nagkantahan nagsayawan,
Nabagsakan ng buko sa ulo
ang kengkoy nilang katropa.
Jump-shot.
Freeze frame.
End credits.

Tapos na ang pelikula.
Pinatay na ng konduktor ang TV at DVD.
Sariling repleksiyon na lang namin
ang nakikita namin sa telebisyon.
Mga repleksiyon ng mga taong umiibig.
Mga repleksiyon ng mga taong sawi.
Mga repleksiyon, pawang mga repleksiyon.

Napabilib ako ni Jestoni Alarcon.
Hindi na ako takot mamatay.
Gusto kong makita ang
pinakamaitim na dilim.
Gusto kong makita ang
pinakanakasisilaw na liwanag.
Gusto kong maranasan ang
pinakamasakit na hinagpis.
Hindi na ako takot mamatay.
Hindi na ako takot mabuhay.
Hindi na ako takot mabagsakan
ng buko sa beach.
Salamat, Jestoni.

Pagkababa ko ng bus ay tumalon ako,
Bigla akong tumigil sa ere.
Tumigil ang lahat.
Freeze frame.
At nagbagsakan mula sa kalangitan
ang mga letra.
End credits.